


ALAHADY PAKA VI - TAONA D2019



« Aoka tsy hitebiteby na hatahotra ny fonareo » (Jo. 14 : 27) »

Ry Kristianina havana, Alahady faha-6 amin'ny Paka izao ka tsy mahagaga raha mampitodika antsika sahadry amin'ny aorian'ny Paka izany hoe ny hivelomantsika ny Paka ka ireo vakiteny arosan'ny Eglizy amintsika nandritra izay Alahady dimy izay dia nentina nanampy antsika nandalina ny toe-panahin'i Kristy sy ny toe-piainan'i Kristy mpiandry ondry tsara, Kristy endriky ny famindram-po, Kristy velona eto amintsika, Kristy foto-boaloboka ka amin'izao dia ny vakiteny manampy antsika hihaina izany toe-panahy rehetra izany.

Vakiteny I : Asa 15, 1-2. 22-29
Tononkira : Salamo 66
Vakiteny II : Apôk. 21, 10-14. 22-23
Evanjely : Jo. 14, 23-29

Tsy hoe hiady irery isika na hikombona fa nomen'i Jesoa ny Fanahiny masina izay niasa tao aminy ka nampibaribary ny fiombonan'ny Trinite masina ka ho oloaraiky tokoa, ho Ray Zanaka Fanahy Masina. Raha te hiombona amin'i Kristy isika izany hoe Kristy mpiara-belona dia mitoetra ao amintsika ny Fanahiny ka afaka

mitandrana ny teniny isika ka manatanteraka izay lazainy amintsika ho tahaka an'i Masina Maria nilaza tamin'ny arkanjely Gabriely *“Aoka ho tanteraka amiko araka ny teninao”* ka tanteraka tokoa satria Renin'Andriamanitra i Masina Maria. Izy nitondra an'i Jesoa amintsika. Raha mitandrana ny tenin'i Jesoa isika vao avy nanavao ny toky tamin'ny batemy ka tonga olom-baovao sy zava-boahary vaovao dia nirahina hitory ny finoana, hamafy ny fanantenana, hamafy ny fiadanana miaraka amin'i Papa Fransoa sy Notre-Dame de la Route. Tsy isika irery no hanatanteraka an'izany fa araky ny nampanantenain'i Jesoa *“raha misy tia ahy dia hitandrana ny teniko ka ho tian'ny Raiko ary eo hankeo aminy izahay ka honina ao aminy”*. Sanatria onenan'ny Fanahin'Andriamanitra hoatry ny tromba isika fa Fanahy mahatonga antsika ho olombaovao.

Kristy mpiara-belona amin'olona isika ka homeny ny Fanahy masina ka olom-baovao ao aminy, Kristy velona isika. *“Fa izay tsy tia ahy kosa tsy mba mitandrana ny teniko ary ny teny zay zarainareo dia tsy ahy fa an-dRaiko”*. Raha mitandrana ny tenin'i Jesoa isika ka manatanteraka azy izay tsy inona fa ny fifankatiavana *“Mifankatiava ianareo tahaka ny nitiavako anareo, ataovy izao ho fahatsiarovana aho”* tsy inona fa ny fanompoana. Izay no maha-mpiandry ondry tsara azy, izay no maha fotoboaloboka an'i Kristy ka mampamokatra ny fiainantsika araky ny sitrak'Andriamanitra. Ny voalazan'i Jesoa amin'ny evanjely dia tsy mandeha ho azy, izay mahatonga azy milaza hoe *“ maro ny zavatra tokony ampianarina anareo fa tsy ho zakanareo fa ho avy ny fanahy masina ilay fanahy ny Mpanafaka alahelo, dia ny Fanahy Masina, Izay hirahehin'ny Ray amin'ny Anarako, no hampianatra anareo ny zavatra rehetra, sy hampahatsiaro anareo ny zavatra rehetra nolazaiko taminareo. »* Ny Fanahiny masina no irahiny, izay no miasa amin'izao fotoana izao raha avelantsika miasa izy. Indrisy fa ny olana matetika dia isika mandratra ny Fanahy masina, tsy connecté aminy isika ka tsy mahagaga raha manaonao foana ka zary manapotika izany ny atao hoe fahotana. Olombaovao isika ao amin'i Kristy ka sokafy ny fo amam-panahintsika hiasany ny Fanahy masina ao ampontsika ao, amin'izay hanana ny herin'ny Fanahy masina isika ilay Fanahy masina niasa tao amin'i Jesoa ka nahatonga azy niteny hoe *“Ato amiko ny Fanahy masina, nirahinao hitory vaovao mahafaly aho, hanala izay mamatopatotra rehetra, mpanafaka alahelo”*. Isika koa dia tahaka izany eo anivon'izao tontolo izao, izany no maha Eglizy Olona Velona antsika mpanorina Eglizy Tranon'Andriamantira izay trano iombonana efa potika noho ny fahotantsika.

Isika izao feno ny Fanahy masina ilay nampantenain'i Kristy ary izany ny voalazantsika teo ampiandohana, efa mampitsinjo antsika amin'ny fiainantsika aorian'ny Paka dia ilay pantekôty vaovao andrandraintsika hanorenantsika fianam-baovao ao amin'Andriamanitra eo anivon'ny Eglizy kely fianakavian'Andriamanitra, eo anivon'ny Eglizy iraka, mba ho aim-baovao entanin'ny Paka ka hampianatra antsika ny lalan-kombana sy ny tena fiainana ary ny fahamarinana dia tsy iza fa I Kristy. Hampanjaka ny rariny sy ny hitsiny isika ka hikatsaka mandrakariva ny soa iombonana ka hahatonga antsika ho mpamafy fiadanana sy fahandriam-pahalemana ka hampijoro ny tena marina hampiombona antsika.

Voalaza ao amin'ny vakiteny voalohany izany raha mitantara ny zava-misy tamin'izany fotoana izany ka manambara fa rehefa avelantsika hiasa tokoa ny Fanahy masina dia hiova ny fiainantsika, ireo olam-piainana sy sedram-piainana dia zary aim-baovao, hery vaovao manosika sy hanampy antsika hanatanteraka ny hafatr'i Kristy hivelona ny tenin'Andriamanitra isika ary ny vokatr'izay dia izay voalazan'i Jesoa ao amin'ny evanjely dia ny fiadanana. Tsy araky ny fandinihan'izao tontolo izao fa araky ny vokatry ny fihavaozana nentin'i Kristy, vokatry ny asan'ny Fanahy Masina ao amintsika ka hahatonga antsika hahita ny marina, hahafantatra izay marina izay ka hifankatia marina tokoa isika, hifanasoa, hitady izay soa iombonana, amin'izay ho mpamafy fiadanana sy fanantenana isika.

Ambaran'ny vakiteny faharoa *“ rehefa tanteraka izany rehetra izany dia nasehony ahy ny tanàna masina, dia i Jerosalema nidina avy any an-danitra, avy amin'Andriamanitra. Namirapiratry ny voninahitr'Andriamanitra izy ary voazavan'ny kintana sy ny vato sarobidy, dia ny vato jaspera izay azo itarafana toy ny kristaly”*

Jerosalema dia ilay tanànan'ny fiadanana sy masina satria misy an'Andriamanitra izany koa no irintsika amin'izao isika hamakivaky ny herinandro vaovao ity, hanjaka eo anivontsika tokoa anie i Kristy. Masina ny fiainantsika raha Andriamanitra eo anivon'ny fiainantsika, eo anivon'ny fianakaviansika Eglizy kely, eo anivon'ny fiaraha-monintsika, eo anivon'ny firenentsika ka amin'izay hiadam-pinaritra isika, izay ilay Jerosalema. Ambaran'i Md Joany amin'ny vakiteny faharoa *“ naseho ahy ny tanana masina nidina avy any an-danitra”*

Ry Jesoa Tompo ô, eto anivonay tokoa ianao na dia efa niakatra any an-danitra, miara-dàlana aminay ianao mba hahatonga anay Kristy mpiara-belona amin'olona, ianao koa no nampanantena anay ilay Fanahinao masina mpanafaka alahelo, hampafantatra anay ny làlan-kombana ka raha mitandrina ny teninao tokoa izahay dia hahazo izany fiadanana izany ka ho afaka mizara izany eo amin'ny mpiara-belona aminay ka hahatonga anay ho Eglizy Olona Velona manorina Eglizy Tranon'Andriamanitra, ilay tranoben'andriamanitra ka ho taranaka mpanorina izahay na dia eo aza ireo zava-manahirana tsy maintsy hetrehina, dia hahatoky fa ao aminay ny Fanahinao hanananay ilay fiadanana nampanantenanao ka hafafinay amin'ireo manodidina, ilay fanampantenana omeonao anay ka hankahery anay hijoro ho fahazavana eo anivon'ny mpiara-belona aminay. Amen

Mompera Arseveka Benjamin Ramaroson